

No Servus, Diener und Habe die Ehre!

Etze kimmt dos

Nej su wos

vu Sömde, n 02. Dezembr 2023



Gertrud Hofmann

Olle Juhre wieder...

Olle Juhre wiedr kimmt ne ock „das Christuskind“, wie s ei dan Liede heißt, nej, vurhar kimmt dr Nikolaus. Heutzutage hout a jo Konkerenz gekricht vu dan Coca-Cola-Weihnachtsmonne. Dar hängt o an langn Seile o moichn Hauswändn. Wenn de dou ei dr Tunklei nufkuckst, wesste ne, hout sich dou ennr gehangn odr will a eibrechn. Ob Septembr konnst de ei ville Geschäftn schun seine Tschokladenbriedr ei olle Griefßn keifn. Und dar „mit der Glocke“ und dan Rentiere geistert jo ou noch iebn Himml. Ich weiß ne, ob dou de Vurfrejde uf dan 'richtschn' Heilchn Nikolaus noch su gruß ös wie ei mannr Kindhejt, wu ou de Geschenke noch iebrsichtlichr worn. Und mir hon sich doumouls iebr a jeds noch gefreet, wenn s ou noch su klejne wor.

Mei ejntsches Drlabnis mit an Nikolause wor vur iebr sibtsch Juhn an Lindnerhause. Mir wouhntn ubn ndern Dache. On Nikolausoubde gobs uf ejmoul a Getrempel und Gepoltr uf n Gange. Aus olle Tiern komm de Leute raus nouchsahn. Und dou kom dar Nikolaus mit an langn weißn Borte, an langn goldn Stobe und mit n goldn Buche. Obr drbeine hott a n Krampus, an ejn zottichn Karl mit annr langn Rutte, mit dar tot a öm sich schlohn, und an grußn Sacke, dan zug a hindr sich har. A machte su an Drosch und grunzte, doss mir Kindr uns vur lautr Angst hindr da Erwachsn vrkruchn und nemieh afierkomm. Ich weiß bis heute ne, wos dar Nikolaus sohte und ob mr wos gekricht hon. Ich wor ock fruh, wie olle bejde wieder gingen und da andern Kindern gings genau su.

A Juhre druf, ei dr Mikolasch-Baracke, kom a nemieh persenlich. A tote ock eischmeißn. Dou ging oubns sachte de Tiere uf und reiflugn a poor Nisse odr Äppl. On Nikolausoubde hing ich wie die andrn Kindr an Strump os Fanstr. Dar wor om andrn Morgn vule mit Pomeranzn, Nissn und sissn Zeuge. Und draußn vur n Fanstr sog mr de Stiefelspurn an Schniee, denn frieher gobs zu dar Zeit gewöhnlich schun hibsich vill Schnie. A poor Jungn drzahltn ei dr Schule, se hätten ou Kouhlestickl ei ihrn Strumpe gehot, wal se ne ömmr gefolgt hon.

Währnd man Schuldinste totn mir Lehrern unsn Örschklasskindr klejne Säckl packn mit Mandarin und Tschokolade. Die wurn on Nikolaustage ei an grußn Sacke vun Hausmeistr vur jedes Klassnzimmer gestallt. Dann pumppte a o ane Tiere, doss mrsch an ganzn Gange horte und machte sich drvou. Und moichmoul ging sugor a mutiches Kind naus kuckn und brochte dan Saak rei. Ane Kollegin hotte an sehr ufgewacktn Jungn ei dr Klasse, dar de ne on Nikolaus glejbe und sich glej ne ferte. Ols a obr dos Pumprn horte, vrschwond a schwuppdich undr dr letzt Bank und weg wor a. A wor dann ou n ganzn Tag noch ziemlich getött.

Vu annr Freundin krichte ich ane Nikolausbrousche geschant. Die hotte ane Pattie, und wenn mr se eischaltntote, fingn die rutn Glosougn o zu flackrn. A poor Tage vur n 6. Dezembr vrhol mr dos zu sehr pravn Schulkindr, wenn ich de Ougn blinkrn ließ und dr Nikolaus zukuckte.

Ei dr heutichn Zeit missn sich de Aldrn extra an Nikolaus bestelln, wal a wajgn lebrlastung nemieh iebrole hiekumm kon. Moichmoul tut a obr salbr ei dr Zeitung schreibn, doss mr sich n bestelln kennte. A brengt ou kenn Krampus mieh mit. Dar Heiliche, dar ömmr vun Nordpole, wu a glej iebrsch Juhre wouhnt, zun Gablunzer Hause gekumm ös, hotte sugor Engl drbeine. Schließlich ös a jo a heilichr Mon, dar ock Gudes will. Sugor a goldnes Telefon zun Chriskindl gob's dou. S ös also nischt mieh zun Fertn wie ei mannr Kindhejt, wu de Rutte moichmoul ubn zun Strumpe rauskuckte trotz dan gudn Zeuge, wos drinne wor. Und fr de Kindr gibts genug, wajgn wosn se sich fertn kinn, dou braucht mr ne ou noch n Nikolaus drzune. Meijnt dr ne ou ?
